

<<你是我的眼>>

（場景：在一住宅單位中，男主角劉光亮正獨個兒在家中，拿著兒子為了今天晚上而為他購買的領呔，臉上帶著恩惠的笑容，因為今天是劉光亮的六十歲生日，兒子、媳婦及孫兒正打算為他籌備六十歲大壽的宴會）

劉光亮獨白：「我叫劉光亮，今年六十歲，雖然以往因為經濟既問題，所以小學畢業之後就無再繼續升學，但係其實我呢份人好易滿足既，只要身邊有一個一直支持我既老婆，仲有一個孝順我既仔，其實就可謂夫復何求架啦」

（對白期間，播放著劉光亮與太太結婚，抱子剛出生的兒子，然後教導兒子讀書，並最後大學畢業的片段）

劉光亮獨白：「我小學畢業之後就入左一間報社裡面做排版既工作，然後一做就做左幾十年啦，人工唔算得上太高，但總算能夠養活我地一家三口，無風無浪就咁過左三十年嘞」

（獨白期間，播放著劉光亮在報社滿手油墨地進行活字排版（即執字粒），然後回家開門後看見老婆與兒子正在飯枱上等候劉光亮，而老婆與兒子則面露笑容，兒子還衝到劉光亮的身邊，給劉光亮一個熱情的擁抱）

「其實人生衝衝幾十年眨下眼就過架啦，我只係希望來緊能夠身體健康，唔好成為屋企人既負累就好架啦」

（正在此時，智能電話響起，劉光亮打開 What's app，傳來五歲孫兒的聲音）

孫：「爺爺，你係邊呀，我地而家出門口啦，你今日係主角，唔好遲到呀。」

太太亦將孫兒的電話拿在手中加了一句「明仔阿爺呀，乜你仲係屋企呀？你係度化粧咩，你仲唔出門口的話係咪要啲親朋戚朋友等你呀？」

「弊，已經咁晏架啦.....」劉光亮此時才猛然醒起，然後再看看牆上的掛鐘，然後二話不說就攞住鎖匙衝了出門口。

（場景：大街上）

走到街上，天色已開始忽暗，而劉光亮亦心急如焚地前往宴會地點，但就在他橫過馬路的時候，卻看不到迎面而來的一架電單車，最終更被電單車撞到了，不久救護車亦到達，並將劉光亮送到醫院接受治療。

（場景：酒樓大廳）

鏡頭一轉，另一邊廂，劉的老婆與兒子卻在酒樓久候劉光亮，一眾親友更已在細細私語，最後劉的老婆便拿起電話，並準備對電話另一頭的劉光亮作出投訴，然而接聽電話的卻是一把陌生的女聲。

「你好，請問你係咪劉太太呀？我姓陳，係醫院既護士，劉生佢啱啱係街度發生左交通意外，而家係病房度接受緊治療，你.....」電話另一邊的護士回答說。

劉太太聽到劉光亮發生交通意外的消息以後，感到十分徬徨，兒子看到媽媽的表情以後，不禁問道：「阿媽，老豆佢係邊呀？」

「阿仔，你老豆佢頭先撞車，而家仲係醫院呀，點算呀點算呀？」劉太太焦急萬分，驚惶失措。

兒子獲悉以後，立即將電話搶過來，「喂？係.....我係佢個仔.....知道.....急診病房.....好我而家即刻過來，唔該。」然後簡單交待一聲以後，便與劉太太、兒媳及孫兒一起離開酒樓，匆匆地前往醫院了解情況。

（場景：醫院急診部）

「醫生醫生，我老公點呀，佢會唔會有事架，老公呀你唔好丟低我呀，嗚.....」

「劉太太你唔駛咁擔心住，劉生雖然俾架電單車撞到，但好在司機及時剎掣，所以劉生只係輕傷，過兩日就無事架啦，但係我都想提醒下你地，佢既視力已經咁差既時候，如果下次出街最好有個人陪佢身邊，尤其是係夜晚既時候，以免佢再因為睇唔到野而再次出現意外就唔好啦。」醫生安慰著劉光亮的家人。

「醫生，你講咩呀？我老豆視力差？佢無同我地講過嗰，而且佢以前仲成日玩電腦添既，你係咪攞錯左呀？」家人聽到醫生的解釋後放下了心頭大石，但同時亦對醫生所說的一番話感到莫名奇妙，兒子不禁詢問。

「原來佢一直都無同你地講過架？其實我睇返劉生係我地呢度既紀錄，佢係好耐之前已經因為睇野唔清楚而求診，並且證實左係黃斑點病變」醫生說。

「黃斑點病變？呢個係乜野病來架？我聽都未聽過嗰」兒子疑惑地問。

「其實呢一個病係由於視網膜的組織在黃斑點上的不正常增生，把接收影像的黃斑點遮蓋，令視野中央的影像扭曲或變成黑影。老年黃斑病變可分為乾性和濕性兩類，早期的老年黃斑點病變徵狀並不明顯，但當它發展成濕性時，視力會突然

迅速變差，更有機會令病人失明。頭先你講過你爸爸成日對住電腦，可能就係因為咁而有所影響，而家你爸爸既視力據我了解只係剩返 0.05，即係正常人睇到 120 米遠的東西，佢要去到 6 米先可以睇得到，情況已經去到嚴重既地步架啦，所以你地日後就係要好好咁睇住佢呀」醫生解釋。

劉的太太與兒子聽到這個消息後感到十分突然，一時之間尚未能夠接受到這個事實，只好由媳婦向醫生說聲「謝謝」，然後醫生便離開診室，剩下眾人等待劉光亮的甦醒。

（場景：病房內）

劉光亮開始醒過來，鏡頭以劉光亮的第一視覺顯示，但看到的只是模糊的影像……

「爸，你醒喎，你見點呀」兒子說。

「老公你嚇死我啦，你係咪想丟低我一個人吖？」老婆悲喜交集地說。

「爺爺，你好返未呀？」孫兒說。

「太好啦老爺，我即刻去出去話俾姑娘聽」然後媳婦便轉身離開病房。

「阿爸，你做乜對眼唔舒服左咁耐都唔俾我地知呀？醫生話如果之前可以及時處理的話，可能你既病情無咁嚴重架？」

「阿仔，想當年……」劉光亮才將事情娓娓道出

（場景：約十年前的報社會議室內，排版部的主管向員工講解著報社的改革計劃）

「隨著時代既進步，執字粒呢樣既工作已經可以電腦化，而為左更有效率咁完成你地既工作，來緊報社會安排你地進行培訓，從而迎合報社未來現代化既發展」

一向學歷較低的劉光亮，過往對電腦的接觸不多，然而他的內心卻會擔心若果他未能在公司改革的時候適應電腦化，很快便會被公司裁員，然後屋企既經濟亦都會頓時變差，所只好在公餘時間不斷練習中文打字，電腦排版操作……

「個凸字究竟點打架呢……月……然後尸……唉，臨老先來學電腦，就係要花多兩倍既時間呀，不過鬼叫你窮呀，頂硬上啦」

「嘩，乜個排版系統咁複雜架，公司真係搵著我呢來攞，死啦，再學唔識，呢鋪真係執包袱架喎。」

劉光亮最終亦能夠繼續留在報社工作，但由於長時間使用電腦的關係，到某一天的工作期間，佢卻開始感到視線不清楚.....

「咦，乜個螢幕中間朦朦地既？」然後嘗試用手在螢幕上抹走但無效，最初他亦沒有在意，以為是因為疲勞的關係，然而他卻發現日復一日地開始變差，而且回家以後亦感到眼睛十分不舒服，所以最後便去了看醫生

（場景：診室內，醫生正在細閱劉光亮的檢查報告）

「劉生，經過檢查之後你患既係黃斑點病變，幸好而家仲係初期，所以如果積極配合治療的話可以減慢佢既病情，但係如果你唔理佢既時候，佢就會惡化落去，最嚴重仲可能會盲添架」醫生向劉光亮解釋道

「如果俾公司知道我呢個時候有呢個病的話，佢一定唔會再錄用我架，而家個仔啱啱先升上中學，而老婆又已經咁耐無做野，俾佢地知道對件事都係無補於事架啦，所以為左頭家，我一定要撐住既」劉光亮心想。

就這樣，雖然視力一日一日變模糊，但係劉光亮一直都瞞著家人有呢個病，直至今天發生意外以後.....

（場景：病房內，家人陪伴著劉光亮，並細聽他述說往事.....）

「你仲咁細過，如果我嗰陣時俾公司知道的話，仲點可以供到你去讀大學，你仲邊有機會有今日吖」劉光亮向兒子說道。

「阿爸，多謝你呀」兒子聽到劉光亮的解釋後，眼泛淚光，百感交集，內疚之餘同時亦深深感受到父親對他的愛。

場景：在家中

劉光亮已出院回家第二天，但由於他已被發現視力出現嚴重障礙，所以家人也不容許他獨自外出，而家中亦只得劉光亮一個，獨個兒在客廳行走的時候，卻看不到地上有一矮凳，所以不小心碰到了，劉光亮事後頹喪地坐在客廳的梳化上，並為著日後的生活感到惆悵。

劉光亮獨白：「人地話唔怕生壞命最怕改壞名，劉光亮呀劉光亮，而家你人生既就好似你既名一樣，光亮真係溜走晒，以後都唔知點算好啦.....」

其後劉光亮聽鎖匙聲，為了不讓家人擔心，臉上也勉強地擠出笑容，但也難掩心中擔心的心情。

「阿爸，今日見好啲未呀？」兒子說。

「都係咁啦，幾十歲人，可以點咩，好既一日唔好既又一日，都唔知仲過得幾多日啦！」劉光亮回答。

「放心啦阿爸，以前你為左我同阿媽辛苦左幾十年，我已經大個架啦，好應該由我去照顧返你，你唔駛再為我操心，反而你要好好咁保重身體呀，不如你比個智能電話我咩」兒子說。

劉光亮自袋中拿出以往使用的智能電話，並嘗試以手指按密碼，但他已看不清按鍵的具體位置，所以亦很氣餒地將電話交予兒子手中。

「阿爸，頭先我去左澳門盲人重建中心，去了解一下對於視力有問題既人佢地可以有乜野輔助工具，佢地教左我做一個叫 **Voice Over** 既模式，那個時候我先至發覺而家有好多先進既設備，可以幫助到一啲有特殊需要既人士既日常生活架，不如等我示範一下俾你睇咩」然後兒子便將電話中“輔助使用”內的 **Voice Over** 模式開啟。

「喲，你只要點一下係選擇項目，電話既語音會話俾你聽你點左既係乜野，然後如果你要選擇的話就點兩下，如果要繼續睇下面既內容，就用三隻手指掃個電話，仲有就係.....」兒子耐心地向劉光亮解釋 **Voice Over** 的操作方法，而劉光亮則不斷在學習嘗試操作。

（場景：三天後，劉光亮仍然一個人在家中）

「請問有詳可以幫到你呢？」劉光亮叫出智能電話的 **SIRI** 功能後，**SIRI** 詢問。

「今日澳門天氣」劉光亮說完後，電話便顯示出當日澳門既天氣狀況，劉光亮点選之後，聽到天陰有雨，然後再啟用 **SIRI** 功能。

「用 **FACETIME** 打俾兒子」不久兒子便接聽電話，並在劉光亮的電話熒幕中出現。

「老豆？有什麼事嗎？」兒子問。

「頭先我聽到話外出會落雨，我幫我睇下你阿媽有無收到衫？」然後劉光亮將手提的鏡頭對著露台的方向，讓兒子看一下。

「我見到露台無晒衫呀，阿媽咁醒又點會唔記得呢，你仲有無野要我幫你睇下呢？」兒子說。

「有呀，我等陣要出街，但係我唔記得條鎖匙放左係邊，你可唔可以幫我望下呀？」

「好呀，你企係度將個電話係屋裡面掃一掃啦」兒子說完後，劉光亮就按兒子的說話拿著電話慢慢地擺動著。

「見到啦，放左係我以前做功課張寫字枱上面呀」兒子看到後向劉光亮說。

「係喎，我都見到啦，今晚記住返來食飯呀，我而家落街買野啦。」

「記得啦，你都要小心啲，有乜野就再 FACETIME 我或者我老婆啦」

「OK！」劉光亮按下結束通話鍵以後坐回椅子上，再啟動 SIRI 功能「打開澳門日報」，然後點選裡面的新聞，聆聽當中的內容，同時心裡說著說「人老左就梗係有啲毛病架啦，比著以前可能我已經乜都做唔到只能夠日日係屋企，慶幸而家科技咁發達，雖然我而家睇野唔清楚，但係仲聽得到，而且屋企人都幫左我唔少，我相信我一定能夠克服呢個困難既。」

（場景：兒子辦公室）

兒子與劉光亮通話後，回頭一望見到身旁的同事 DICKY 手拿著最新型號的智能電話，不禁一問「嘩，DICKY，你又換手提噃!?對上嗰一部都用左唔夠一年喎，其實你密密咁換，咁啲舊機咪好嘍囉。」

「嘻嘻，無法啦，我地啲後生既總係要走在潮流最前線，如果唔係好快俾人話 OUT 架啦，所以我都係月光族，而且仲係光棍一名添，有無好人家介紹呀」DICKY 打趣笑著說。

「好心你就慳啲啦，換完啲手機其實好浪費架，其實好多人都未有條件，尤其是係啲殘疾人士，佢地好有需要.....」兒子說到這裡，突然靈機一閃「喂 DICKY，你平日咁大嘍，如果我想你將以前啲舊電話送俾我，然後再轉贈俾一啲有需要既視障人士，你估你肯唔肯吖噃!？」

「吓?盲既可以用智能手機架咩?我未聽過喎，不過如果你用得著又咁有意義既話，我又唔係好介意既，咁等我過兩日擺俾你啦」DICKY 說。

「噃，一於咁話啦，我代那些視障人士多謝你先呀！」

（場景：盲人重建中心）

三日後，兒子拿著 DICKY 轉贈的手機到盲人重建中心，然後向中心的職員說「你好呀，我姓劉架，我知道好多視障人士都仲未有機會學習操作智能手機，咁啱我呢度有三部，我仲係裡面設定左一啲能夠方便視障人士操作既模式同應用程式架啦，你睇下邊個有需要既時候就送俾佢地啦。」

「劉生，我代表我地既會員多謝你，其實正如你所講，社會上既殘疾人士仲未被大眾去認識，其實如果佢地能夠獲得一定既輔導工具，對佢地既生活可以帶來好大既幫助架」中心職員說。

「無錯，所以我更學懂珍惜自己所擁有既，同時係自己能力範圍內幫助一啲有需要既人，希望真係可以幫助到佢地啦。」

劉的兒子事後將轉贈事件上載至各大社交平台，並標註了朋友 DICKY，感謝他的慷慨解囊，而事件獲得了他們的朋友十分多「說讚」，其後更影響到身邊的朋友，將沒有用的智能手機轉贈給劉的兒子後再轉贈到盲人重建中心，同時，劉的兒子亦會經常前往盲人重建中心，在中心內向視障人士教授使用智能電話的方法，為社會上更多視障的人士學懂使用智能電話，為他們的生活帶來方便。

劇後字幕

根據社會工作局最新公佈的數字，截至 2017 年 12 月 31 日本澳持有效殘疾評估登記證各類別累計人數為 11,845 人，其中患有視力殘疾的為 607 人，佔總體殘疾人口約 5%。

雖然殘疾只佔澳門人口的一少部份，但他們卻與普通人沒有太大分別，亦享有例如就業、教育等一般市民應有權利，因此只要身邊的人願意給予殘疾人士適當的輔助及支持，便能讓他們正常地過日常生活.....

同創健康澳門，共建幸福家園

（背景為不同的資訊科技輔助工具的圖片）

<< 全劇完 >>